

·sawcuenh·

Lwgbawx

□ Yiz Ciz / 余 执

Daxmeh gou youq Namzningz Si Gih Yinzminz Yihiyen yw bingh, aeu miz boux he buenx de. Daj de haeuj yihiyen le, daegnuengx buenx de geij haemh, dahnuengx buenx de geij haemh, ciep daeuj couh lwnz daengz gou bae buenx de lo.

Daxmeh gou bineix ndaej 78 bi, vah gaeuq gangj mbouj loek, faex geq rag nduk, vunz geq uk vaih. Daxmeh gou ciengzseiz damz gyauej ngunh, daraiz. Couh lau de miz saek ngoenz baez laemx roengz couh caiq hix ndwn mbouj hwnj. Baezneix haeuj yihiyen hix mbouj rox yw ndaej ndei mbouj ndei.

Ngoenzhaenx banhaemh roengz-ban le, gou caeuq mehyah guhdoi hix dap dungceh bae Namzningz, okdou gaxgonq, dahlwg daengq naeuz: “Dap dizsw bae daengz yihiyen sai ngaenz caeuq seizgan lai, sou roengz dungceh le couh dap didez daengz aen can Sinhminz Lu roengz ci, cij aeu 4 maenz ngaenz couh ndaej. Daj aen cuzgouj B2 okbae, caiq riengz roen cigsoh byaij gvaq 3 aen daeng-hoengzloeg, aiq byaij 10 faencung couh ndaej daengz Gih Yinzminz Yihiyen lo.”

Dahlwg lau dou dingq mbouj cingcuj, yawj loh mbouj mingzbej, de lij veh mbaw doz he hawj gou daiq youq gwnz ndang.

Dungceh daengz Namzningz seiz, cingq doiq seiz roengzban, gwnz haw vunz bae ci dauq ndaetfodfod.

Byaij ok hojcehcan, gyoengq boux rag hek doxciengj gvaqdaeu j cam dou aeu mbouj aeu dapci, gou mbouj dingz dwk bi fwngz, mbouj dingz dwk bi gyauej, gvanbaz cigsoh coh aen can didez cei q gaenh byaij bae.

Ndaw singz couh dwg ndaw singz, gwnz gai vunz ndaetfodfod, ndaw didez hix dwg vunz gveujfoenfoen, dou cawx ndaej biuq hwnj daengz ndaw didez seiz, ndaw ci gaenq dwg vunz ndaet ndaej mbouj miz giz naengh.

Gou gag naemj: Dahlwg naeuz couh song aen can, naengh didez faen lai cung couh daengz aen can he, miz mbouj miz giz naengh hix mbouj youqgaenj lo.

Yaephe couh daengz can dahraix lo, dou ciuq mbaw doz dahlwg veh itloh byaij baenaj.

Namzningz loh seuq faex heu, gizgiz dwg vunz, gwnz gai vunz byaij ci buet, nauhyied youh onjdingh, gou lau byaij loek roen, mbouj gamj yawj vunz yawj ci, roengzsim byaij roen yawj loh, aen daenghoengzloeg daih’ it gvaqbae lo.

Seizneix mbwn fonxfubfub, gwnz gai daeng ronghsagsag, dou daeuj daengz aen daenghoengzloeg daih-ngeih, doiqnaj byag miz song diuz gai, diuzdiuz cungj dwg sohlitlit, byaij gvaq diuz gai lawz bae cij deng ni? Dou miz di dawz mbouj dingh cawjeiq lo, mehyah naeuz: “Mbouj rox couh cam vunz, byaij loek roen couh dwgrengz lo.”

Gou yawjyawj seiqhenz, dajsuenq youq ndaw gyoengq vunz ganj loh vuebvueb ndawde ra boux he cam roen, seizneix daenghoengz rongh lo, daihgua guh comz he ndwn youq caj daengloeg. Bien ndang gou ndwn miz dahsau aiq miz 20 lai bi he, de vunz sang ndang reux, noh hau naj maeq, daenj dauq vinjva raez ndeu, yawj hwnjdaeu j coengmingz youh roxsoq.

Gou dawz mbaw doz dahlwg veh okdaeu j, ndenq daengz doiqnaj dahsau neix cam: “Dahlwg, Gih Yinzminz Yihiyen gvaq diuz gai lawz bae?”

Dahsau cim gou da he, naeuz: “Gou mbouj rox ne.”

Gou naeuz: “Mwngz mbouj dwg vunz Namzningz ha.”

Dahsau naeuz: “Mbouj dwg ne.”

Dahsau gangj sat couh cienq naj gvaq mbiengj he bae.

Daengloeg rongh lo, dou ciuq baihnaj byaij bae, ndawsim gag naemj: Cam vunz mbouj rox, doq byaij doq yawj, byaij loek caiq gangj.

Dahsau byaij youq doiqnaj dou, geu vinj raez de lumj mbawliux ndaw seizcin nei riengz gij yamq din de bi bae bi dauq, gij siengq neix gig maez vunz.

Mbwn yied daeuj yied laep, gou coi mehyah byaij vaiqdi, mbouj geij nanz dou couh byaij bae baihgong dahsau neix lo, gou dauq laeng yawj da he, cingq caeuq de song da doxcieu baez he, de couh vaiqvid ngaemgyaeu j byaij roen, mbouj geij nanz de youh byaij youq baihgong dou lo.

Dou gvanbaz couh yienghneix caeuq de mwngz yaep bae gonq gou yaep doeklaeng doxlwnz byaij baenaj. Daengz bakdou yihiyen seiz, gou caen naemj daihsing doiq de naeuz “gizneix couh dwg Gih Yinzminz Yihiyen, mwngz rox youq gyawz ha”, yawj de baenzlawz hoiz gou. Seizneix de dawz soujgih okdaeu j dwk dien-hah, dou cijndei byaij haeuj yihiyen bae, mbouj caiq leix de.

Dou daeuj daengz ranzbingh, daxmeh naengh youq bien congz yawj densi, de raen dou daeuj daengz, naeuz de ngamq gwn gvaq haeux-caeuz, cam dou ndaej gwn caengz,

danghnaeuz caengz gwn couh vaiqdi okbae ra gwn, mboujnex, 8 diemj cung le, yihiyen couh mbouj hawj vunz seizbient haeujok lo.

Daxmeh youq yihiyen ndaej cib-geij ngoenz lo, yawj hwnjdaeu j ndangdaej de gaenq bienq ndei lai lo.

Ndawranz miz vunz bingh, boux-boux cungj yousim, daxmeh daeuj ywbingh cibgeij ngoenz neix, lwglwg lanlan byawz ndaej daeuj yawj cungj daeuj caez lo, couh ngamq lw daeglwg gou Daeggyangz caengz ndaej daeuj yawj ndwi.

Daeggyangz youq Gvangjcouh guh hong, de naeuz nyaengq lai, baezneix couh mbouj ndaej dauq yawj daxbuz lo, de naeuz dahyoux de youq Namzningz, gaenq daengq dahyoux de ndaejhoengq couh daeuj yawj.

Gou cam: “Meh, Daeggyangz naeuz heuh dahyoux de daeuj yawj mwngz, de daeuj gvaq la?”

Daxmeh naeuz caengz raen miz saek dah daeuj gvaq.

Daxmeh vah ngamq sat, dahsau he couh byaij haeuj ranzbingh daeuj, gou baez raen couh rox dahsau neix couh dwg haxbaenh gou coh de cam loh haenx.

Mbouj rox dwg najnyaenq rox-naeuz byaij loh ndang cik lai, de naj hoengzfefe. De menh byaij daengz henz congz, cam daxmeh ndangdaej baenzlawz yiengh, bingh yw ndaej baenzlawz yiengh, de daengq daxmeh aeu onjsim ywbingh, ndaej gwn couh gwn lai di, hab ninz couh ninz lai di. De gangj sat le, ndenq aen hoengzbau he hawj daxmeh, sing saeq doiq dou gvanbaz naeuz: “Goeng’ au mehsimj, sou menh youq nw, gou dauqbae hwnjban gonq lo.”

Gou caen naemj cam de dwg

byawz, mehyah dawz dinbuh gou rag baez he, ei qsei mbouj hawj gou cam, gou coenz vah ringx daengz byai linx youh deng gyan roengz dungx bae lo. Gou mbouj rox dahsau neix nyinh mbouj nyinh ndaej ok gou couh dwg boux vunz haxbaenh coh de cam loh, ndawsim gou lumj ngamq gwn duz nengzgengz nei, mbouj rox baenzlawz gangj ndei.

Mehyah naeuz: “Dah neix aiq dwg dahyoux Daeggyangz luba.”

Gou naeuz couh dwg, daxmeh hix naeuz couh dwg.

Gou dawz saehcingz daj goek daengz byai lwnh hawj daxmeh nyi. Daxmeh naeuz: “Dahsau yienghneix, vunz gyaue sim mbouj ndei, guh vunz cungj mbouj miz saekdi sim ndei baenz maz vunz, engq mbouj hab baenz lwgbawx ranz raeuz.”

Mehyah naeuz: “Gou raen dahsau yienghneix ndei, seizneix dauqcauq miz vunz yungh gak yiengh banhfap daeuj yaeuh vunz, de ukgyaeu j lingz, rox singj vaiq, danghnaeuz youq gwnz gai seizbient caeuq vunz gangj vah, mbouj lau vunz cuengq yw deng yaeuh ha, dahsau yienghneix mbouj vei hwnj dangq.”

Danghnaeuz dahsau neix ngoenz-laeng caen baenz lwgbawx gou, gou caen miz di sim mbouj net. Meh yah youh vah ndongjndatndat naeuz aeu gij lwgbawx neix cij ndei. Dou song boux youq ndaw ranzbingh doxceng hwnjdaeu j, sing gangj yied daeuj yied sang, husw gvaqdaeu j geij baez, naeuz bouxbingh yae k yietnaiq, heuh dou gaej hemq lai.

Doeklaeng gou naeuz: “Gienh saeh neix aeu lwnh hawj Daeggyangz nyi, baenz mbouj baenz aeu guh yah, caih de gag dawzdingh.”

